

ՏԵՂԵԿԱՏՈՒ

ДІЕГІІЕГІАДОУ

دييجيگادو

Հրատարակումին Գահիրէի ՀԲԸՄ-ի

نشرة جمعية القاهرة الخيرية الأرمنية العامة



**ՍՐԲԱԼՈՅՍ ՄԻՒՌՆՍՈՐՀՆԷՔԻ ԱՐԱՐՈՂՈՒԹԻՒՆ
ՄԱՅՐ ԱԹՈՒ Ս. ԷԶՄԻԱԾԻՆ
27 Սեպտեմբեր 2015**



ՀԲԸՄ-Ի ՀԱՅԿԱԿԱՆ ՀԱՄԱՅՈՒՅՆԱՅԻՆ ՀԱՄԱՎՍԱՐԱՆԻ ԳԱՀԻՐԷԻ ՄԱՍՆԱՃԻՂԻ ՃԱՏՐԱԿԻ ԱԿՈՒՄԲԻ ՎԿԱՅԱԿԱՆՆԵՐՈՒ ԲԱՇԽՈՒՄ

Շաբաթ, 24 Յոկտեմբեր 2015-ի երեկոյեան ժամը 6-ին, Գահիրեի ՀԲԸՄ-ի Հելիոպոլսոյ Չագըր Մշակութային Կեդրոնին մէջ, տեղի ունեցաւ ՀԲԸՄ-ի Հայկական Համացանցային Համալսարանի (ՀՀՀ-ի) Գահիրեի մասնաճիւղի «Ճատրակի Դաստիարակչական Ծրագիր»-ի առաջին բաժնի շրջանաւարտներու վկայագրերու բաշխումը:

Մշակութային սոյն միջոցառման ներկայ գտնուեցան ՀԲԸՄ-ի Եգիպտոսի Շրջանակային Յանձնաժողովի եւ Գահիրեի ՀԲԸՄ-ի ղեկավարներ, եկեղեցւոյ, մամլոյ ներկայացուցիչներ, եգիպտահայ համայնքի անդամներ:

Բարի գալուստի եւ բացման խօսքով հանդէս եկաւ Գահիրեի ՀԲԸՄ-ի Վարչութեան ատենապետ Տոքթ. Վիգէն Ծիզմեճեան: «Առաջին անգամն է որ մեր քով տեղի կ'ունենայ ճատրակի վկայագրերու բաշխում, հակառակ որ ճատրակը միշտ հետաքրքրած է մեր գաղութին անդամները:

Երկու տարի առաջ ՀԲԸՄ-ՀՀՀ-ի ճատրակի առցանց դասընթացքները սկսան Գահիրեի ՀԲԸՄ-ի Չագըր Մշակութային Կեդրոնին մէջ:

Տարի մը առաջ՝ 2014-ի Յոկտեմբերին, ՀՀՀ-ի Եգիպտոսի ներկայացուցչութեան կցորդ Տիկին Աննա Տոլապճեան-Թրայեանի առաջարկով, սկսաւ ճատրակի խմբային դասընթացքը: Այսպիսով, ՀՀՀ-ի ճատրակի Առցանց Դասընթացքի առաջին շրջանաւարտներուն հետ, եգիպտահայ համայնքը կը վերականգնէ իր երկարամեայ աւանդութիւնը՝ նոր տեսանկիւնէ, արհեստագիտական նորագոյն միջոցներով ներկայացնելով ճատրակը՝ իր մարզական ծրագրին մէջ», - ըսաւ Վիգէն Ծիզմեճեան:

Այս ան հրաւիրեց տիկին Աննա Տոլապճեան-Թրայեանը՝ ներկայացնելու ՀՀՀ-ի գործունեութիւնը եւ բացատրութիւններ տալու դասընթացքներուն մասին:

Տիկին Աննան ըսաւ. «ՀԲԸՄ-ՀՀՀ-ի կրթական ծրագիրը շատ մեծ յաջողութիւն ար-

ձանագրած է Սփիւռքի եւ աշխարհի տարածքին: Արդէն տարբեր երկիրներու եւ ազգութիւններու պատկանող 4000 աշակերտ գրանցուած են: Եգիպտոսէն ցարդ 20 աշակերտ ունեցած ենք, ներառեալ ճատրակը: Մեր՝ համեմատաբար նօսր համայնքէն, ճատրակի դասընթացքներուն մասնակցելու համար երկու տարի առաջ արձանագրուեցան 12 հոգի, սակայն շրջանաւարտ եղան 10 հոգի: Տարիքային մեծ տարբերութիւն կար խումբին մէջ, որ սակայն, արգելք չհանդիսացաւ դասընթացքները շարունակելու: Ընդհանուր հետաքրքրութիւնն ու սերը ճատրակին հանդէպ, համախմբեց զանոնք եւ հնարաւորութիւն տուաւ յաջողութեամբ աւարտելու առաջին շրջանը:

Մեր շրջանաւարտները, անցնելով ճատրակի դասընթացքներու առաջին ու երկրորդ աստիճանները, խրախուսուելով ՀՀՀ-ի Երեւանի ճատրակի հրահանգիչ Վահագն Զալանթարեանի եւ համակարգող Արփիկ Թաւաքալեանի կազմակերպած դասերէն ու ցուցմունքներէն, ցանկութիւն յայտնեցին մասնակցելու նաեւ յաջորդ շրջանի ընդլայնուած, երրորդ աստիճանի դասընթացքներուն:

Միաժամանակ խումբը հիմնադրած է ՀԲԸՄ-ՀՀՀ-ի Եգիպտոսի ճատրակի Ակումբ, որ շատ աշխոյժ գործունեութիւն ծաւալած է՝ կանոնաւոր կերպով առցանց կազմակերպելով մրցահանդէսներ, մրցաշարեր եւ հանդիպումներ: Ակումբը կազմած է նաեւ իր Դիմատետրային (Facebook) խումբը, որ բաց է ճատրակի սիրահար եգիպտահայ ռեւէ անդամի համար»:

ՀՀՀ-ի գործունեութեան մասին տեղեկութիւն տուող կարճատեւ տեսերիզի ցուցադրումէն վերջ, Տիկին Աննան դարձեալ խօսեցաւ ՀՀՀ-ի Գահիրեի ճատրակի խումբին գործունեութեան՝ եւ մասնաւորաբար այն անդամներուն մասին, որոնք սիրայօժար ստանձնած են ուսուցիչ-աշակերտ դերը՝ զուգահեռաբար սորվելով եւ սորվեցնե-



լով: Անոնք են՝ Գեորգ Աւանեան, Վարդան Շուշանեան, Էտի եւ Խաչիկ Գասապեաններ:

«ՀՀՀ-ն ճանաչողական հնարաւորութիւն կը ստեղծէ ե՛ւ հայերու, ե՛ւ օտարներու համար: -Իր խօսքը շարունակեց տիկին Աննա: -Միայն լեզուին տիրապետելը չի բաւեր, պետք է ազգի մը ամբողջ մշակոյթին տիրապետել՝ հասկնալու եւ ճիշդ խօսելու համար լեզուն: Ուրեմն, օտարներու կողմէ հետաքրքրութիւն ցուցաբերուած է ՀՀՀ-ի կազմակերպած ոչ միայն Հայոց Լեզուի, այլ նաեւ՝ պատմութեան, ճարտարապետութեան, երաժշտութեան եւ մշակոյթի այլ ճիւղերու հանդէպ:

Կ'ուզեմ տեղեկացնել ձեզ ՀՀՀ-ի մէջ մեկնարկուած վերջին նորոյթին մասին: ՀՀՀ-ն առցանց լոյս ընծայած է Ելեկտրոնային Գիրքը (E-Book), որ Հայաստանի մասին գիտելիքներու եւ տեղեկատուութեան մեծ աղբիւր մըն է»:

Տիկին Աննայի խօսքէն յետոյ, համակարգիչով՝ Skype Call-ով կապ հաստատուեցաւ ՀՀՀ-ի Հայաստանի ներկայացուցիչներ Նայիրա Գասապեանի, Յասմիկ Զալափեանի, Արփինէ Թաւաքալեանի եւ ճատրակի ուսուցիչ՝ Վահագն Զալանթարեանի հետ, որոնք ողջունեցին միջոցառման մասնակիցները, ջերմօրէն շնորհաւորելով եւ բարեմաղթանքներ յղելով շրջանաւարտներուն:

Անոնք կարեւորեցին Գահիրէի մէջ ճատրակի Ակումբին հիմնադրումը: Այս կապը կ'ընթանար Սփիւռք-Հայաստան անբաժա-

նելի կամուրջը խորհրդանշող Կոմիտասեան «Կռունկ»ի թովիչ հնչիւններու ուղեկցութեամբ (ջութակի նուագակցութեամբ):

Միջոցառումը կ'ընդգրկէր նաեւ մշակութային բաժին մը: Ջութակի եւ դաշնամուրի զուգակցմամբ ելոյթ ունեցան Հայաստանէն ժամանակաւորապէս Գահիրէ հաստատուած Լիլիթ Նահապետեան (ջութակ) եւ Ժաննա Գեորգեան (դաշնամուր), կատարելով հայկական եւ դասական երաժշտութեան սմոյշներ:

Վերջապէս մօտեցաւ միջոցառման կարեւոր բաժինը՝ վկայականներու տուչութեան կարգը: Տոքթ. Վիգէն Ճիգմեճեան, շնորհաւորեց եւ վկայականները յանձնեց շրջանաւարտներուն՝ Անդրանիկ Յակոբեան, Արին Սիմոնեան, Մեսրոպ Ղազէլեան, Ռոճեր Սուրօ, Տանիէլ Գալլալեան եւ Րաֆֆի Սաատ: Ան յատուկ շնորհակալութիւն յայտնեց չորս ուսուցիչ-աշակերտներուն՝ իրենց պատրաստակամութեան եւ ջանքեր չինսայելուն համար: Վերջիններս, վկայականներէ զատ, ստացան նաեւ շնորհակալագրեր:

Ապա, Տիկին Աննա Տոլապճեան իր եզրափակիչ խօսքին մէջ, շնորհակալութիւն յայտնեց Գահիրէի ՀԲԸՄ-ի Վարչութեան անդամ Տիկին Ռուպինա Ասլանեան-Նորարեւեանին, միջոցառման արհեստագիտական մասը անխոնջ կերպով կազմակերպելուն համար, որմէ յետոյ տեղի ունեցաւ պատշաճ հիւրասիրութիւն մը:

«Տ»